

永平府志

(光緒)

一

ISBN 988-978-316-9



二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一二三八八七九〇〇

定價：人民幣 九五〇〇〇元（全書共三百一冊）

永平府志序

光緒二年重修
板威敬勝書院

永平府志序

同治九年

朝廷以北洋重地思得文武大
臣坐鎮其閒特

命合肥相國總督畿輔移駐天
津公抵任亟亟籌海防內修文

教養人才課吏治兼纂通志檄
各郡縣一律舉行智由灤州牧
擢守永平下車伊始卽修書院
購書籍俾多士以時講習復飭
屬修志乘除灤州昌黎續修未
久於是遷安樂亭撫甯等志相

繼成臨榆及盧龍亦將觀厥成
余嘉各大令之勤於編輯也而
府志自乾隆中年增修此後缺
焉莫考世事日新守土者可漫
然置之耶爰敦請樂亭史香崖
孝廉秉筆采訪校對分任書院

肄業士子不二年歲厥事蓋百
餘年文獻燦然備具矣嘗考畿
輔輿圖前襟大河背枕居庸右
太行左滄海隆上都而朝萬國
茂以加矣然列郡如大名廣平
南接豫疆阻河爲界正定順德

西鄰晉地跨山爲藩要皆內地
鄰封無所謂邊防者卽宣化倚
邊天津際海邊與海相距奚啻
千里然則擁羣巒以爲城俯巨
壑以爲池其我永平一郡乎夫
永平古遼西地盧塞蜿蜒東走

邊牆高下城堡星羅由漢唐以
迄於明講求戰守之法者至詳
且備

國朝龍起大東定鼎幽燕中外
一家久已犁烽堠爲良田銷兵
戈爲農器然而古人之陳跡何

可沒也渤海迴環二千餘里而
永平適當其中沿海諸口俱可
乘潮內駛方今通商各國市埠
林立其所以嚴中外之防者可
不及時圖之耶夫事有伏於數
十年之先而見於數十年之後

者其機固不可不察也洪維

聖天子威棱遠播海鏡山明今

相國奉

命鎮撫華夷爲國家立久大之
業且使海濱之民目不見兵革
生斯世者抑何幸歟是編也成

其於通志有裨與否不敢知而
其防邊防海之策官斯土者於
此博稽前事度地揆時以爲未
雨之綢繆或不無一得之助也
光緒五年歲次己卯五月朔知
永平府事新化游智開撰

凡例

謹案永平爲古右北平遼西二郡地而遼西之地居多五代以後分置平灤營三州而平營之名與古相混山川人物每致誤牽金元郡乘今皆不傳

顧祖禹讀史方輿紀要紀永平事有引金志云者

明萬厯初閩人郭造卿

在戚南塘幕府網羅天下圖籍又復親歷薊北諸邊遣卒出塞窮濡河源至再至三必得實乃已作燕史數百卷蓋十年而後成又以其餘日作永平志一百三十卷文雖晦澀而一方之掌故頗爲詳備國初顧亭林遊於永平已稱其全書不可得

見則郭志之散佚非一日矣今之存者惟康熙乾隆二志康熙志稱爲萊陽宋玉叔觀察撰次而非出觀察一手體例未允考據多疏其所援引俱不註書名變易原文難以徵信且有張冠李戴者乾隆志體例較爲整齊而於前志所引古事古人仍復承譌襲謬毫無辨證蓋以構書無多是以因陋就簡王澹人之跋固已自言之矣茲博考前聞逐加釐訂古事古人必詳所出正其譌者十之三補其闕者十之四搜討之艱同於創始爰發凡起例如左